

萬 有 文 庫

第 二 集 七 百 種

王 雲 五 主 編


惜 抱 軒 詩 文 集

( 四 )

姚 鼐 著

商 務 印 書 館 發 行





惜抱軒詩文集

(四)

姚鼐 著

國學基本叢書

編主五雲王  
庫文有萬  
種百七集二第  
集文詩軒抱惜  
冊四

中華民國二十四年九月初版

著作者 姚 鼎

發行人 王 雲 五  
上海河南路

印刷所 商 務 印 書 館  
上海河南路

發行所 商 務 印 書 館  
上海及各埠

大

\*C五六七

雙

# 惜抱軒詩集卷六

## 今體七十九首

### 夜抵樅陽

輕帆挂與白雲來。棹擊中流天倒開。五月江聲千里客。夜深同到射蛟臺。

### 山行

布穀飛飛勸早耕。春鋤撲撲趁初晴。千層石樹通行路。一帶山田放水聲。

### 貴池道中

曉過池州郭。人家傍曲谿。白花臨岸發。青草度江齊。秋浦殘林雨。春山徧竹雞。東樓懷李白。風日至今迷。

黟縣道中

蒼翠壓人低。流雲落大谿。連巖羸草日。懸磴帶陰霓。雨歇羣山響。春深萬木齊。寥寥方久立。谷鳥一爲啼。

出池州

桃花霧繞碧谿頭。春水才通楊葉洲。四面青山花萬點。緩風搖櫂出池州。

江上竹枝辭

滔滔無際是秋瀾。估客牽江泊夜灘。江岸唱歌江上聽。不知風雨爲誰寒。蕪湖山露小於船。池口銅陵山接連。那得青山江岸盡。止應西上到青天。年年八月旺潮期。送潮送到小姑祠。惟有滿天風共雨。小姑祠上送郎時。東風送客上江船。西風催客下江船。天公若肯如儂願。便作西風吹一年。

古意

青柳高樓白馬駒。五陵春醉酒家胡。君家新市長安少。臣里佳人楚國無。在下願爲荑蔕席。與郎儂作博山鑪。東風門外蘼蕪晚。更折瑤華向路隅。

效西崑體四首

咸陽

斬年宮外八川流。輦道環通徧雍州。萬里龜鼉橫碧海。六王鐘鼓在朱樓。地中闕表終南肺。天上城闕太華旒。獨令上林辭賦客。曲江蕭瑟不勝愁。

渚宮

樓觀雲陽入窈冥。兩東門對楚山青。錦帆暮雨迴江渚。鳴籟雄風起洞庭。北望六雙飛鷺鴈。西來五尺困蜻蜓。渚宮衰草秋風裏。愁絕當年帝女靈。

洛陽

洛陽形勝匹西秦。累葉章陵氣尚新。甲第雙嶠如黽谷。芳林九派似江濱。生前父有張常侍。死後兒還史

道人借問西園冠蓋盡。溼螢飛暗小平津。

越臺

臣佗事漢抱孫年。滄海無波阜井廛。嶺嶠春臺餘總帳。牂柯秋水下樓船。空詢萬里番禺醬。不及千金好時田。一自建章荆棘後。越巫方更與誰傳。

寄和劉海峯三丈游伊闕之作

聞去梁園超廣武。西登闕塞眺黃河。伊陽風雨從中出。洛下山川向北多。白髮上賓聊自許。青春歸興復如何。且從浩蕩詩懷劇。莫念沈淪壯歲過。

寺寓贈左一青

南北風煙萬里深。對君王舍有香林。春來夜夜江南夢。不及高齋聽雨心。

送一青歸因寄仲鄂

與君兄弟夙相依。洛下今年遇陸機。天末四愁思莫致。秋來九辨送將歸。行窮南汝山初見。吟到澄江葉盡飛。若把迷方語鄉里。更憐心事卜居違。

### 出塞

連營鼓角夜星環。擐甲弓刀曉露閒。列障三邊開幕府。勒兵萬騎出蕭關。黃河日落人旋渡。青海春深鴈未還。聞道南庭先效順。輕車齊會涿邪山。

八月十五日。與朱子穎。孝純。王禹卿。文治。集黑窰廠。

寒吹動關河。登臺白日俄。孤雲高渤海。秋色渡滹池。海內詞人在。尊前往事多。夜來明月上。烏鵲意如何。

### 送人往鄴

九月燕郊草尚青。送君且爲住郵亭。明朝月落漳河曉。無限飛鴻不可聽。

### 贈戴東原



新聞高論誦田巴。槐市秋來步落花。羣士盛衰占碩果。六經明晦望萌芽。漢儒止數揚雄氏。魯使猶迷顏闔家。未必蒲輪徵晚至。卽今名已動京華。

寄仲鄂

天外思將新歲酒。雪中同醉故人家。折梅憶客楚江遠。凍竹閉門山郭斜。春晝鋤犁無素業。少年詞賦共青霞。長安溝柳看垂發。直恐相望到鬢華。

天門山

萬里江流斷。雙崖地脈通。冥冥浮積氣。漠漠送長風。滄海孤帆外。神州落照中。人生如鳥迹。獨上俯鴻蒙。

望潛山

道邊隻屨復雙屨。天半大山宮。小山客子出林暮。喚渡居人微雨寒。閉關橫空積樹雲。漠漠交流斷。逕谿潺潺。不知蒼谷最深處。喬松白鶴誰往還。

由宿松向黃梅

秋山紅葉重。煙樹暮巖鐘。水澹松茲郭。月生天柱峯。人閒二南嶽。江上六禪宗。悵望停車者。征途何所從。

宿德化縣

南行三百里。舉首白雲端。大壑連陰靄。中天峙碧巒。夜潮千嶂閉。明月九江寒。更就東林宿。蕭條鐘磬闌。

題負薪圖

落葉被逕行客稀。晚風吹樹斜陽微。空山短日惜餘景。野老長鑱甘息機。瀑流側足巨巖響。峯高倚杖秋雲飛。邨林春黍戶將閉。寒谷束荆人未歸。

南昌竹枝辭

南昌南去盡山谿。白石清沙不見泥。一到鄱陽風浪黑。行人那更出江西。

城邊江內出新洲。南北彎彎客纜舟。莫上滕王閣前望。青天無地斷江流。

石鐘山

挂帆初月出。風起大孤塘。遙夜來湖口。江天寒淼茫。石潭流激激。巖樹鬱蒼蒼。千載元豐士。風流何可忘。

出湖口

扁舟昨夜泊湖涯。霜重蘆枯宿鴈知。朝日忽生彭澤縣。挂帆無數小姑祠。

送客之南昌

野曠深春草。江空起夏雲。樅陽更西上。日日見匡君。

寄友

千仞青巖萬壑雲。辭家藤杖謁匡君。玉簫吹處非人世。江上秋風偶一聞。

郡樓寓目

檻前淵渚後山坳。劇郡樓臺草樹交。白霧乍開人入市。丹林猶綴鶴歸巢。授衣霜露齊民節。倚劍江天大國郊。竟作陳登牀下客。長鑣思訪地肥饒。

由郡城適樅陽漫詠

森森江流汎楫維。蕭蕭岸戍見旌旗。斜陽萬里背人去。落葉千聲與客悲。寂寞子雲期後世。蒼茫詹尹謝先知。青山滿目身無累。惟有憑磯坐罟師。

關山月

遼海初生月。長城幾度秋。夜吹羌管笛。風滿戍亭樓。紫塞斜銀漢。青天澹玉鉤。如何渭橋渡。止道似牽牛。

秦宮辭

挾瑟佳人載輦行。渭南秋月綺羅情。秦皇愛聽邯鄲曲。不及叢臺夜宴聲。露下梧桐墜井欄。滿宮明月見君難。傳聞博浪霓旌過。磁石宮門閉夜寒。

漢宮辭四首

君王武帳御船樓。一片旌旗拂女牛。日晚移舟鳴趙瑟。昆明池上月如鉤。  
井幹樓上見飛塵。宛馬新來集渭濱。欲詔海西先涕泣。帷中誰報李夫人。  
關外花迎帳殿開。箜篌隨上射蛟臺。柳邊細馬雕鞍過。新自河閒望氣來。  
金壘春殿酌瓊漿。夜賜黃門樂府倡。三十六宮歌舞地。一時風靜玉階涼。

黃河曲

負羽千營臂角端。平明卷幕北風寒。青天西挂黃河水。立馬長榆塞外看。  
黃河繚繞漠南山。秋盡蒲昌鴈盡還。萬里白雲飛不去。朝朝長結玉門關。

山行

石徑幽巖竟日曛。杖藤行逐遠樵聞。縱無世外冥鴻翼。猶愛林閒野鹿羣。  
春渚天桃無雜樹。暮天殘雨有行雲。故人谿口如相問。何物空山可贈君。

一青仲孚往金陵屬訪耕南三丈消息

城中前輩盡積顏。混迹劉伶尙閉關。孤艇著書江水上。百年閱世酒尊閒。天邊落木流楊子。秋盡寒雲出蔣山。若憶團亭舊漁釣。挂帆明月共君還。

榆中

直北天低見磧山。黃河南下曲如環。白榆夜雜雕戈戍。青草春稀牧馬還。寒吹滿空雲出塞。暮天無色日平關。千秋猶對秦時月。多少功名大漠閒。

初雪憶去年是時經潛山下

窗外聞風竹。緣階雪遂深。我思山谷寺。天遠大江陰。石氣青霞嶂。秋聲黃葉林。更穿巖徑去。應阻故人尋。

送左冠倫丈往平羅

萬里靈州外。孤懷焉可論。關山疑路盡。士馬尙秋屯。河水流中國。寒陽下塞門。重開漢四郡。豪傑幾家存。

南朝

宮雉南朝接玉繩。幾年金掌露華承。衣冠志節悲終始。草莽英雄有廢興。海壯五州開北府。江通三峽督西陵。銷沈轉眼愁隨主。欲作長城更不能。

登報恩寺塔

山迴煙繞出浮圖。迴踏青霄萬里孤。斷鴈秋雲飄莽蒼。高甍飛閣散榛蕪。江風颯颯吹天日。海氣昏昏浸楚吳。多少人閒興廢理。蔣山松柏正模糊。

登永濟寺閣寺是中山王舊園

中山王亦起臨濠。萬馬中原返節旄。坊第大功酬上將。江天小閣坐人豪。綺羅昔有巖花見。鐘磬今流石殿高。憑檻碧雲飛鳥外。夕陽天壓廣陵濤。

金陵曉發

湖海茫茫曉未分。風煙漠漠棹還聞。連宵雪壓橫江水。半壁山騰建業雲。春氣臥龍將跋浪。寒天斷鴈不成羣。乘潮鼓楫離淮口。擊劍悲歌下海濱。

丹徒寓樓上作

鬱鬱山川面倚樓。側身江左舊徐州。寒潮不隔中原望。白日遙縣大海流。北府千年京口鎮。西風一夜秣陵舟。古今只此滄波色。煙霧何時竟掉頭。

望岱

峻極通天地。陰陽辨魯齊。連峯渤海外。流岫穆陵西。樹據金輿路。雲深玉檢泥。山川供効佞。千載一淒迷。

泊臨清漳口

泊舟寒渚對褰裊。岸木蒼蒼水鏡開。滄海霧搖孤月上。青天影合二流來。平生苦憶清江櫂。深夜休嫌濁酒杯。明發風帆好停處。拂衣先上魯連臺。



由張秋至汶上口號四首

汶川千里路漫漫。三峽船如上闢難。篷底春風九十日。穀城山隔缺隄看。  
細草春陰碧四圍。空隄花落燕初飛。澹雲何處飄殘雨。迎取魚山神女歸。  
風定遙山水面青。垂楊不見釣舟停。晚來忽唱橈歌去。疑載高人小洞庭。  
帆前莽蒼暗平蕪。風雨神靈定有無。一片雲遮分水廟。四垂天入蜀山湖。

太白樓

李白任城住。於今九百秋。青天東海月。長爲挂南樓。三月楊雪花。餘春客濟州。憑闌空汶水。相憶下滄洲。

濟寧城東酒樓憶亡友馬牧儕

汶河垂柳萬枝輕。把酒高樓對馬卿。十四年來兩行淚。春風重過濟州城。

河上雜詩四首

碣沛蟠紆接下相。風雲咫尺會舟航。中原日落關城白。西楚河來天地黃。山閉彭門千里暮。林開祠廟一  
陂荒。背關懷此君休笑。自古男兒悲故鄉。

海上晴天雷雨逐。驚濤奔入亂山開。青冥楚越孤帆去。浩蕩淮沂四面來。春草不知韓信里。秋風曾到項  
王臺。誰明鼓楫中悲慨。仰視雲霄數鴈迴。

使者治隄久未還。東南波浪海雲閒。只愁天上桃花水。浸失淮南桂樹山。任土司農操戶版。薄征都尉且  
河關。勤憂中澤須良吏。又待霓旌閭里闌。

南登楚岸出楓林。回首天邊萬里心。日月空濛探海窟。魚龍縹緲踏春陰。故人京洛思朝夕。鷗鳥滄波自  
古今。河上近連江上路。蒼蒼千嶂碧煙深。

### 淮上有懷

吳鉤結客佩秋霜。臨別燕郊各盡觴。草色獨隨孤棹遠。淮陰春盡水茫茫。

### 淮陰釣臺

人傑乘時會。功成運已非。可憐高鳥盡。回憶釣魚磯。淮上春風起。高臺柳絮飛。王孫殊未反。惆悵落斜暉。

留別揚州諸君

年少諸郎各俊才。要余夜盡廣陵杯。明月相隨天際去。思君還傍月邊來。

由儀真至滁州口號三首

醉點紅燈碧樹明。夜看亭閣廣陵城。醒來忽向蒼山路。獨聽寒松曲澗聲。  
初日牆隅出未高。孤花叢樾閒相遭。陂塘行度重陰底。惟有蛙聲和桔槔。  
陰陰巖偃蒼龍腹。片片雲飛白鶴翎。江浦縣南來暮雨。滁州山露半邊青。

寄潞川

江雲萬重合。中有故人行。西風吹落照。一半向蕪城。  
君家種新竹。牆陰雨中長。若爲北窗來。蕭蕭數聲響。

南陵送潞川

楚澤橫千里。登高望不分。山城正風雪。江路忽逢君。歲晏梅初坼。長宵酒易醺。只愁明發去。空水與寒雲。

過江浦縣

江出天門雲水長。客心孤迥路蒼茫。寒山自繞涂中碧。不與斜暉過歷陽。

徐州

霽雪城頭戲馬場。憑城三面瞰蒼涼。河流畫地分中夏。雲氣隨風出大荒。竟入山林惟孔令。遠求風雅獨元王。閒關此日方爲客。殘照天涯數鴈行。

邳州

遼闊山川縱遠游。又欵風帽過邳州。千秋遺蹟尋黃石。一片寒陽下白樓。難得真龍逢漢帝。易將窮虎縛溫侯。英雄潦倒尋常事。惜與曹瞞作畫籌。

過汶上弔王彥章

楊劉兵度大梁危。飲泣猶當奮一麾。亂世烏飛難擇木。男兒豹死自留皮。天連白草橫殘壘。日落陰風擁大旗。莫問夾河爭戰地。渾流徙去黍離離。

# 惜抱軒詩集卷七

## 今體六十九首

### 戲贈山陰陶生

凜立塵中而渥丹。自言鴻寶受劉安。貧無素業彈長鋏。行人朱門著小冠。候日竟知中景再。談天始識九州寬。東方惜未遭時會。便作蘇張未是難。

### 戲贈宏夫兄

昂藏七尺氣縱橫。篋內中宵寶劍鳴。屠市故人從偶語。屏風侍史不知名。鬢華攬鏡增霜雪。胸智探囊有甲兵。仍作棄繻關內客。西風吹短曼胡纓。

### 戲贈鄞章生

山澤歌謳自負薪。誰招跌宕入京塵。翹身曳步驚風止。蹙齧顏顏擬聖人。捫蝨九流隨俯仰。雕龍萬古會精神。若教一與貂蟬列。便作當時折檻臣。

蔡萬資履元水鄉菱藕圖

平湖秋櫂木蘭船。醉入汀花弄碧煙。日暮都忘天近遠。坐看明月到尊前。綠萍白芷春陂生。菱葉藕花秋氣清。語兒涇畔各含思。爲待先生吹笛行。隔岸越山青倒開。花光湖影照裴裒。圖成張向西風裏。野鶴天邊飛欲來。

寄仲孚應宿

蟲臂觀生非有象。馬肝持論故無親。虛名那辨星牽輓。猛士難翻日轉輪。但使琴漁從叔夜。不妨櫻筍送殘春。白雲憑語相思劇。三月谿山兩故人。

送曹效伯司務歸里

觚稜回首暮雲空。拂袖歸途似御風。解厭奔趨將虎子。定無喜怒爲狙公。故人長揖都亭外。新月多情滄

海東行上成山。滄天碧。早知蓬閣落楮中。

送左墨谿往貴州

何處黔中郡。憐君最少時。今猶借旅食。明復送將離。夏口經春闊。辰陽到日遲。臨岐無以慰。迴鴈與歸期。

法源寺時張夔川侍讀引疾同游

臥碣唐朝寺。春階上草芽。客來清磬歇。鳥啁夕陽斜。筒水澆青圃。檐風隕白花。欲借投絨老。終日問楞迦。

赴山東

同秦澹初雄飛道長。朱克齋岐王蘭圃。士葵兩比部。游洪恩寺。時秦王將往主山西試。僕與克齋

古寺松杉一鳥鳴。初暎煙霧兩階清。風幡秋氣飄鐘磬。草木晴嵐入檻楹。坐倚團蒲身近遠。出看車轍路縱橫。明朝相憶皆千里。那易僧窗啜乳茗。

賦得昭烈宅



涿水東流草樹荒。千秋已比沛中陽。依然桑蓋垂籬落。誰種蕪菁負曉霜。高臥登樓豪自許。入山披髮意非狂。平生髀肉銷鞍馬。游子何任悲故鄉。

張方伯諱秉文祠

歷數天將改。藩籬國早亡。士餘忠壯志。家在戰爭場。女烈甘懷石。臣心盡布裳。同閔悲舊史。異代人祠堂。樹積陰雲黑。旗翻落日黃。行游魂魄毅。溟海地茫茫。

密雲縣

當道孤城一水邊。漁陽斜照隔城懸。斷崖朔吹來陰地。連塞橫山蔽遠天。設險檀州防禦所。建安蓓令壘。湮年男兒未辦安邊策。略借曹瞞定損賢。

清苑望郎山有懷朱克齋時知衛輝府

男兒三十分銅竹。多少功名到白頭。紫陌鶯花故人牘。黃河風雨郡城樓。欲將北海同樽酒。遶盡西山到衛州。回首數峯蒼翠在。幾人能不憶林邱。

定州

東橫海右中山國。西接天邊御射臺。辨謗獲君從古少。成功食子令人哀。飛流倒馬關中出。急雨盧龍塞外來。欲下高原更迴首。尙疑奇士在蒿萊。

呂翁祠

白荷花照水娟娟。綠柳千條壞檻前。午過微陰行客倦。呂翁祠畔聽秋蟬。

邯鄲口號

邯鄲妙伎繡襦衣。屢屣無雙鼓瑟希。止作低頭嘶養婦。不如匍匐壽陵歸。雖囊有意來成市。玉貌無端亦被圍。秋色滿空吾徑醉。西山當面挂斜暉。

彰德懷古

鞞鐸居然擁伯才。地蟠河朔氣佳哉。丹崖秋幸黃華館。玉貌春歌金鳳臺。漳水東流何日盡。高城西對夕

陽開獨憐石柱平城去。猶似銅人洛下來。

疑塚

祖虞胄稷兩難求。枯骨誰知屬夏侯。邢史何嘗識天道。邾婁家盡大長秋。

蕩陰有懷嵇侍中

晉朝城壘結愁雲。播蕩金輿此戰氛。事去萇宏猶有血。時危繻葛不能軍。冥鴻物外誰當篡。野鶴雞中故不羣。西望山陽林竹盡。寒聲蕭瑟詎堪聞。

洪縣

曉色高原上。連山夾路隅。單車度淇水。秋雨綠王芻。聞道青巖迹。長懷隱者徒。林巒深翳蔚。中有片雲孤。

黃陂道中

故鄉東望隔齊安。馬首才旋去不難。略似霸陵臨渭上。瑟聲清怨走邯鄲。

懷集書山庶子

遺學千秋賴服膺。閉門白首向青箠。伏生老有殘經懼。韓愈師爲舉世憎。終夜思公今底柱。秋風吹客又巴陵。滔滔身世成何事。愧憶當年許代興。

懷劉海峯先生

先生高臥楚雲旁。賤子飄搖每憶鄉。四海但知存父執。一鳴嘗記值孫陽。於今耽酒能多少。他日奇文恐散亡。脫足耦耕如未晚。百年吾亦髮蒼蒼。

懷王禹卿太守

大江五月水湯湯。送爾西南守夜郎。聞道還家生白髮。可憐解印縱清狂。天垂襄漢涵秋色。水下金焦接大荒。青草洞庭還獨去。空山樅桂渺相望。

懷程魚門舍人

淮南倒屣盡賢賓。綸閣今稱老舍人。潦倒青春長似醉。交游白首每如新。一椽託足終何處。四海知髯故絕倫。惟有詩情渾不減。獨吟今夕莫傷神。

渡江

秋風生郡外。江漢合舟前。靄靄列城樹。搖搖長薄煙。南州殊未極。西嶂正蒼然。不識臨崖叟。垂綸復幾年。

官塘

碧雲巖壑盤遙勢。斜日榛林映晚清。澗虎欲來風滿谷。四山秋葉一時鳴。

萬年庵次劉石荈韻以呈補山

驛路陰將雨。林深鳥不喧。遠風來習習。涼葉忽翻翻。野曠蟲何怨。秋成物自恩。迴依僧舍憩。寒水靜當門。觀化吾生眇。焉知從古年。平生聞赤壁。邀客上青煙。霧雨藏南嶽。江湖蕩左偏。前峯猶自遠。未可盡夤緣。前輩輜軒過。風流憶宛然。人隨寒鴈遠。迹付野僧傳。礪戶藏秋小。虛空放喙圓。欲窮生滅理。雲影在諸天。

壁有吾鄉張鏡壑閣學詩。今年閣學亡矣。

湘陰

雨積湘東行客難。嘯蟻楓樹四山寒。晚日黃陵戍前出。湖雲江水白漫漫。

道中回寄長沙諸君

日月行踪兩不留。新交故友孰從游。歸人夜夜聽山雨。落鴈聲聲下郡樓。萬壑盤來趨鄂渚。千峯斷處是潭州。別離倏忽真成老。青草湖邊對暮秋。

岳州城上

高接雲霄下石磯。城頭終日敞清暉。孤筇落照同千里。白水青天各四圍。山自衡陽皆北向。鴈過江外更南飛。人間好景湘波上。卻照新生白髮歸。

夜起岳陽樓見月

高樓深夜靜秋空。蕩蕩江湖積氣通。萬頃波平天四面。九霄風定月當中。雲閒朱鳥峯何處。水上蒼龍瑟

未終。便欲拂衣瓊島外。止留清嘯落湘東。

漢口竹枝辭

揚州錦繡越州醅。巨木如山寫蜀材。黃鶴樓頭望鐙火。夜深江北估船來。  
蜀江水長漢江低。江水東流也向西。霜後西風江盡落。可憐離別漢陽隄。

信陽

已逢秋鴈下江沱。更望飛蓬捲大河。短日人行鄆阨少。長淮山繞義陽多。水源四瀆思乘桴。地險三關每  
荷戈。海內艾安輶傳緩。獨將停策問巖阿。

論墨絕句九首

宣和香劑用油煙。奚李前撫竟邈然。筆法而今論篆畫。江南三絕自當年。  
涉足塵埃世態生。山林養節久方成。論松略似觀人法。誰及新安戴彥衡。  
朝鮮舊國解燒松。使者朝正數笏從。著硯未能堅似石。卻無膠滯不妨濃。  
事見老學庵筆記

膠折燕山風莫勝。篋中片片似春冰。時工止解緣邊漆。不悟堅金儼故棱。除卻廷珪跨乃翁。幾家絕藝後能同。來男作相虞兒匠。何怪方今曹素功。

霄漢樓憑江水空。鶴峯書畫散秋風。盛時猶記先人說。淚與殘丸滴硯中。先君外家任大理公。藏書畫甚富。皆大理先世鶴峯先生所蓄。今有鶴峯墨。奇品也。

程君文筆工無比。姿媚何嘗解俗書。累壓篋中爲長物。不妨啜汁賞心餘。程魚門多藏程君房。羅小華物。名其齋曰三長。墨其一也。

我愛瑤田善論琴。博聞思復好深湛。才傳墨法五千杵。已失家財十萬金。程瑤田語云。墨以多杵爲佳。倍於初時。墨不過千杵。瑤田用古法。杵至三千。已極難。而程君房必五千杵。

年年兩袖染成烏。佳字奇文一筆無。惟向天涯寫歸興。故應銘背作思鱸。范成大製墨事。見老學庵筆記。

### 祝芷塘編修德麟接葉亭圖

人爲碧海神山侶。亭傍叢花醜石安。異世定懷風景好。此生得倚玉枝難。衣冠前輩名相繼。琴弈中宵興未闌。昨日移居已陳迹。就君時索畫圖看。



鄭前邨以辰州守被議授員外郎

銅符分守楚雲開。襖被今隨秋色迴。閨閣臥時傳治績。江山行處助詩才。爲郎父老家安在。作相公孫國  
又推青瑣幾人憐。故侶白頭相遇數銜杯。

喬鷗邨 鍾吳江邨圖

素產吳淞水。春風未別家。閉門深翠竹。展席上飛花。客散看陰轉。鷺唳到日斜。恩恩將好景。題咏在京華。  
翁學士方綱蘇米齋

宋賢遺故蹟。乃在嶺南山。海上流雲氣。冥濛石壁閒。披榛逢節使。摹石載舟還。遠興高齋對。猶令客動顏。  
送朱子穎孝純知泰安府

當日長安一布衣。十年糠覈食猶肥。遨遊誰識爲巴守。調笑何嘗入世機。巒瘴盡穿江塞路。嶽雲來款洞  
天扉。東西踪跡君休論。珍重平生志莫違。

岷嶓東接秦山陽。歷歷專城待俊良。埽定蛛蝥將偃伯。登封鸚鵡欲來王。禁中伏奏心偏壯。劍外遭迴鬢已蒼。若會明堂陳治績。豈忘沂汶古時狂。  
文筆人閒劉海峯。牢籠百代一時窮。別來書到長安少。死去才令天下空。傳說足疲登陟罷。尙應舌在笑談雄。君懷師友頻郵置。消息淮南幾次通。  
禹卿自入滇中路。不見陵雲作賦才。剖竹西南仍放浪。挂帆江漢竟歸來。往年使酒同燕市。九日悲歌上廢臺。此世論心常恨少。至今相望各懷哉。

冬至。大風雪。次日。同錢籜石詹事。程魚門吏部。翁覃谿錢辛楣兩學士。曹習菴中允。陸耳山刑部。集吳白華侍讀寓同賦。得三字三十韻。

侍讀城西住。西望城上嵐。雪明邀數客。風定卽同驂。嶺照斜規掩。林鐘晚韻縮。聽詩情窈窕。說士味醺醺。燭盡櫺街鼓。杯傾倒室壘。昨朝寒太劇。此歲日窮南。氣抱虛堂白。聲搖空閣酣。閉將同蟄螿。臥欲作僵蠶。綵仗從天轉。瓊膏灑地覃。農田占穀麥。齋殿映松栴。圓陞宵陪位。前衙曉放參。是日停朝賀頻逢薰燎慶。竊有負茲慙。大祀。肅以疾未陪。雖替祠官職。曾求國典諳。竹宮今日禮。茨屋異時談。急景看如此。遐思嘿有含。瑾知坏戶暖。壤愛滌塗甘。酒幟懸風店。漁蓑向凍潭。靜尋封逕崦。響聽打窗庵。茲意仍遲暮。當前且樂湛。醉歸

曹適百病滿月幾三重德吾嘗慕多材世所貪羣公高韻在游地奉陪堪接臭皆幽蕙連根比灌藍敢援交吉禹終愈附音譚西徼蠻猶桀方隅澤待涵洪頤今向舉幕府正深探唯鵲巢須埽蟬蛸股盡戡雪霜更卒愍日月腐儒耽疏養咸逾量樽壘況盍簪因思王趙舊今夜宿巖岷謂琴德損之

飲鄭前邨寓舍觀其兩郎君新作文藝前邨本出先伯之門追感往昔作此二首

君居空館一牀橫霽雪階除半尺明避世重來金馬日向余久得石交情張鐙酒煖真歡伯擁袖詩寒覺瘦生蕭瑟思鄉懷舊意當軒星轉北風聲

省垣羈宦迹相親再世論交況有神聞說伯高真可學從游桑扈見長貧中年樂趣殊兒輩此日儒林少丈人金玉欣看文價貴眼前過邁又超倫

元宵曹習菴中允家燕集

聲名座上逢前輩鐙火堂中值令辰攜手故交皆好事當頭新月最憐春太平不數神龍節鼓舞宜容蟻  
蝨臣夜夜元宵吾未厭相逢誰似酒濡脣

演綸入都賦贈兼懷樞亭作江漢書院山長二首

昔別燕郊路。今看草又春。還留三載客。爲對再來人。酒態君都減。詩懷家更貧。恩慙頭並白。鐙火一相親。君家昔全盛。再相一經傳。伯氏方遲出。清名似古賢。入宮羣女日。男子詣曹年。悵惜風塵裏。蕭疏江漢邊。

寄葉書山十丈

側聞八十志猶長。盡取遺經發憲章。一卷豈容羣閔市。千秋何讓再升堂。無人當代傳朱墨。有願平生結老蒼。瞻望淮南真室邈。褒褻燕北又春陽。葉劉年歲略相隨。先伯同行又後之。至貴不關天子爵。齊名起作衆人師。青州邴鄭原同術。林下瞻孚倏異時。四國傳公欣老健。一家如我獨漣洏。

禘祭前一日齋宿官舍懷左一青時聞其罷官始還

少年尙戀雞豚會。將老寧追鴻鶴翔。風閣聲搖情歷亂。春山雲接夢飛揚。君歸白首無餘事。江照青天送一航。鐙火弟兄相見熱。正余寒夜倒衣裳。

雲南布政使王芥子入覲賦贈二首

維藩萬里護邊黎。擁節三年祀碧雞。草綠閉關銅柱外。江喧行部鐵橋西。蠻夷月出邀歌舞。城郭風柔靜鼓聲。安遠最宜張祝在。莫嫌功伐奏璇題。  
繡衣持斧鎮潭州。解帶賓筵值素秋。密樹萬鐙圍作伎。清湘千尺照迴舟。歸艎鄂渚青楓晚。移節滇南白日流。石廩祝融煙霧裏。幾能散髮澹淹留。

送弟訐赴杭州後一日行草橋卻寄

汝猶爲客日。吾亦未歸人。復有山川隔。寧同少小親。疏林更下葉。晚陌每揚塵。欲得長懷弭。彌如車轉輪。

得朱子穎書

使君書札發齊州。戰伐新經欲白頭。出涕潺湲哀萬室。獨居威望鎮諸侯。清秋念我狂尊酒。落日同誰眺郡樓。海內幾人功力建。腐儒端合任沈浮。

# 惜抱軒詩集卷八

## 今體八十六首

### 雄縣詠周世宗

世宗北伐志猶勤。山後寧容地剖分。天意自留耶律氏。人心俄變殿前軍。五朝庶見眞神武。再世何難嗣守文。反覆興亡無處問。瓦橋關外又斜曛。

### 平原詠東方生

陸戟千官列。衣冠九尺豪。滑稽通強諫。辭賦變離騷。車就公孫借。家令少婦操。惟羞齒編貝。長對口無毛。去歲吾邑喪葉花。南庶子。今秋喪王懷坡吏部。皆文行爲後學之師。又皆紹丈人行也。道中念之。追愴竟日。作一詩以寄海峯先生。

吾邑平居三數賢。十年風雨地相懸。文章後死能無懼。日月東流逝每然。滄海一筇憑嶽觀。青山千嶂待江船。畢將宿草銘幽墓。止就先生臥短椽。

漫興

故人揖我燕山前。送我來過清汝川。海右青山不可極。中原落日何茫然。牛羊落落散高壠。車馬駸駸誰少年。往來斯世卒無補。俯愧古人青簡編。

朱無逸孝廉自平陰來會賦贈

自愛名山一杖筇。敢言老子迹猶龍。布帆垂拂淮南樹。芒屨來登日觀峯。雲海似於人有約。冰天豈意客相從。憑君欲問平生業。倚聽寒巖夜壑鐘。

題子穎所作登日觀圖

窮臘陰凌蔽暮曛。高巖孤迹此偕君。前生定結名山諾。到死羞爲封禪文。豈有神靈通默禱。偶逢晴霽漫懷欣。卻從元旦官齋靜。看掃滄洲萬里雲。

次韻子穎送別三首

盤盤秦山石。終古不相離。石上雲如蓋。青天多路岐。浮雲將客去。盤石此心知。諒守平生誼。寧無後見期。  
海月依巖上。官齋記客來。登樓一俯仰。窺牖共裴裒。楮引千峯氣。心思萬古才。爲留三百字。長對碧雲開。  
白髮遲聞道。青山且縱狂。江風清一曲。樹日蔽千章。古哲惟文字。天心豈喪亡。當憂商訂少。暇日一東望。

乙未春出都留別同館諸君

同承天詔發遺編。對案常餐少府錢。海內文章皆輻湊。坐中人物似珠聯。三春紅藥黨衣上。兩度槐黃落  
硯前。歸向漁樵談盛事。平生奉教得羣賢。

汶上舟中

春風迎我自江淮。岸柳將陰花漸開。盡室相看浮汶去。數山如畫入船來。微波夕照融當面。飛鳥長空近  
好懷。欲上濟樓呼李白。月澄滄海玉爲桮。



江行絕句

天低兩岸直。風緩夾江灣。  
樅陽猶未到。已見皖公山。

夏日

空庭朝復暮。邈爾若無依。  
自顧與人遠。方知近道稀。  
暑雲檐外盡。晚日竹中微。  
谷鳥翩翩影。孤翔識所歸。

夏夜

舊讀殘書向几橫。新陰鄰木隔牆生。  
檐風草閣方孤坐。雲月蕉窗度二更。  
擾攘蠶茧無一影。纏綿絡緯有餘聲。  
謳吟自覺偷閒便。那比前賢挾勝情。

曉齋有述

盡舍人閒事。將求達者機。  
開軒垂草露。曉日潤煙霏。  
梧竹清千尺。雲峯碧四圍。  
不知滄海內。此志孰相依。

泥汊阻風

泥汊絕岸菰蘆風。吹逐白雲如轉蓬。兀茲小舟未可下。杳然疊嶂何當通。一夜寒谿聞落木。萬里長江同拍空。懷抱須向碧天盡。起借漁郎沽酒筒。

### 宿攝山寺

嚴風洗霧出芙蓉。含冷流哀越幾重。拄杖曙雲驚鳥宿。古碑秋雨讀苔封。交流急澗鳴千步。極北憑江更一峯。誰識風濤鄰咫尺。不妨幽壑自從容。

### 出金陵留示故舊

又向青谿十日留。依然雙闕望牛頭。交游聚處思移宅。衰病行時愛棹舟。蕭寺風多長似雨。後湖煙澹總如秋。摩揩老眼僧書內。不爲興亡作淚流。

### 竹林寺懷王禹卿

盤磴上香臺。雙峯倚檻開。江流天影盡。海氣地陰來。左右皆松響。蕭條獨客回。他時君到此。空復憶裴裒。

招隱寺

竹林層檻閣。江水照晴空。杖策來招隱。巖松與澗風。鳥聲含雨細。樵徑隔雲通。使恐鳴泉曲。彈琴值戴公。  
江行  
夜宿蕭然伴釣翁。曉乘涼月出蘆中。縱橫島嶼中流失。繚繞雲煙萬里空。燕尾水分斜渚岸。魚鱗波颭夕陽風。散人隨意江南北。處處青山戶牖同。

同禹卿拙齋登木末樓

江邊攜酒送春歸。霽雨登樓風滿衣。賈舶霾雲吹暗浪。佛圖懸日照空磯。故交縱蕩情忘老。寒衲逢迎語亦稀。第一江山容易到。舉杯猶欲盡斜暉。

惠照寺。或言古木蘭院也。見禹卿於此寫維摩詰經。

落盡淮南萬樹紅。晝陰僧院鳥玲瓏。檐含梅子黃時雨。戶進新篁綠處風。出世了無香海界。置身体在碧

紗籠鐘堂一飯成遺迹。回首天花丈室空。

雨後

晝陰沈地一花明。裂紙窗前素卷橫。展讀未終雷雨適。竹軒梧閣作秋聲。

江上送吳殿麟定遠歛

我行江北路漫漫。送爾江南山萬盤。青天落日如相憶。更倚蓮花峯上看。

題二王帖

自斷平生誓墓餘。會稽東去世情疏。無端卻念虞安吉。不似田閒種菜書。偶有所感。書此自嘲。勿謂譏右軍也。

寫付官奴論一通。千秋俯首有涪翁。自憐無力收遺本。梁帝何嘗擅折衷。

古人已與不傳亡。優劣誰堪品二王。地下右軍如可作。詎將知己許文皇。

餘杭甥作桓家婦。妙蹟從汙寒具油。忠義有靈應不忿。幾能藏棄託清流。太白對

太白樓

太白樓頭空復空。滄洲晴照碧流東。久傷白髮生明鏡。每見青山憶謝公。萬壑巖松鳴水上。九秋霜鶴入雲中。不妨無客聞高詠。自有江山興未窮。

燕子磯

裊裊丹崖挂薜蘿。石亭松檜俯驚波。蒲帆從此通滄海。藜杖曾攜眺曲阿。舟楫客逢前日少。江山秋見夕陽多。水雲洲渚還相錯。獨鴈流哀奈遠何。

寄王禹卿

竟日無人至。蕭蕭風雨涼。樓臺憑晚霽。天地正青蒼。思爾西湖去。擎舟春草長。無因聞玉笛。煙月夜琅琅。

答客

鳳城恩近賁新除。鴻漸都升省閣居。楚國多聞推左史。漢臣清望動中書。春深文讌盈金谷。日宴儒林論

石渠盛世彈冠誠欲往。祗憐衰髮不勝梳。

懷朱竹君

學士文章三十年。清修難弟亦稱賢。肯令節似郊祁詘。何必才爲絳灌憐。世態期期求復古。酒懷浩浩欲登仙。一時門下稱英少。誰是侯芭受太元。

懷陳伯思

壯年車馬劇馳奔。晚節疏慵日閉門。奉粟幾時能飽朔。合尊何處更留髡。室中婢老都無齒。竈下奴清不茹葷。料得涼宵風雨急。誦詩流涕卽令原。

涼階

涼階今夕又飛螢。倚檻風前已涕零。人迹不如修竹影。每隨明月到中庭。

題僧照

少通輕俠老如冰。禁足蒲團學小乘。閒說秣陵前日事。只疑元是六朝僧。

鮑鸞書自歛渡江。問業於蒙陋。媿其意。贈以詩。

我如山徑斷行軒。擁腫枝柯大樹存。節目何由能待問。青黃久已謝爲樽。披榛客自非流俗。岐路誰當見道原。共對小庭芳草積。林風吹晚更無言。

敬敷書院值雪

空庭殘雪尙飄蕭。時有栖雅語寂寥。久坐不知身世處。起登高閣見江潮。

霄漢樓

三十年前登此樓。招攜綠鬢賦滄洲。四山雜樹排檐入。萬里清江抱郡流。過眼雲煙窺物外。凭欄花鳥又枝頭。層軒尙有斜陽白。更就明霞望逝鷗。

春日漫興

春冷江城裏。端居到日斜。閉門生逕草。空砌墮鄰花。亂帙從行鼠。分殮與聚鴉。千生彈指過。何處惜年華。  
芳草深春後。高樓擁樹端。一城萋更綠。累日未曾看。江氣浮煙薄。山光抱郡寒。故人猶辱問。數字自長安。  
春動彭蠡鴈。蕭蕭正北飛。長空照江水。孤影與斜暉。託處吾將老。平生侶更稀。一聲當檻外。舉首忽沾衣。  
絃月藏雲氣。幽庭自夜明。樹疏懸鳥宿。花密照人行。書冊催兒誦。衣囊檢婦情。人閒紛感觸。何處見無生。

又絕句

新蕉才展中心綠。芳杏將殘半樹紅。門掩小庭無客到。呼兒相對立春風。  
几榻塵生坐不知。一鐙深夜照書帷。江邊春盡瀟瀟雨。空館花開又落時。

自詠

羣賢鼓舞赴明廷。陋巷無車戶久扃。已作元龍牀下士。每書子玉座旁銘。故交四海多衰白。何事千秋託汗青。風雪繞窗鐙火暗。更披朱墨讀遺經。

聞河決。張瑞書以陝汝道督工沒焉。愴悼作詩。



歲賦長菱築水墉。又聞萬室入波衝。王尊勇竟爲冥死。趙孟儕還謝禹庸。祠廟吏民垂淚過。衣冠先釁想魂從。衰罷媿乏當時用。焉敢蠶膏議楚龔。

細雨

細雨餘春尙薄寒。綠窗風定蕙香殘。七年同種階前樹。獨坐花開掩淚看。

留客

高齋西面向澄江。緩酌蘭陵春酒缸。莫厭坐深風露重。宵分圓月始盈窗。

寄子穎禹卿

拔地凌江峙碧峯。水雲禪榻此相從。解衣蘿薜巖前石。倚被旃檀閣外鐘。三客竝知非一世。兩山迴望有餘蹤。太虛爲室時相見。豈爲離憂日置胸。

銷暑

古木陰能大。空牆日亦幽。風絲垂縷女。雨蔓長牽牛。尙友誠多遜。離人庶寡羞。暑窗深竹韻。危坐與神謀。

不寐聞江聲

憶昔乘舟徧遠征。和風惡浪每殊情。同舟死喪身今老。欹枕江聲入皖城。

夏日絕句二首

數株當戶綠交加。徙倚前榮見早霞。忽有宿禽驚起語。露梢飛落石榴花。

牆頭高樹綠雲天。謝盡餘花未噪蟬。掩卷看陰移午後。數聲嘯鳥在風前。

夏夜

黃昏急雨夜中收。起見華雲吐玉鉤。久立玲瓏階下影。樹梢風過已鳴秋。

穀樹

牆西生穀兩株連。陰蔽斜陽媚夕煙。惡木豈能妨志士。吾廬何厭聒繁蟬。窗閒細響鳴秋籟。屋角新光照

上絃。幸假不才居隙地。清風時爲至江天。

感秋

秋草萋萋蘆荻花。涼風嫋嫋大江涯。雨餘墜棗兼黃葉。日落歸禽背絳霞。俯仰羣生同逆旅。棲遲百里亦離家。舖糟晚欲從漁父。倚待亭皋立柱斜。

題畫梅

老夫對客常思臥。誰寫疏枝劇可憐。渾憶揚州喚吹笛。梅花嶺上值新年。

魚門編修曩以一詩送僕南歸。今失其藁。更向僕鈔取。因併一詩寄之。

六藝高論玉塵揮。百家楊乘莫能非。欣登雲閣仍簪筆。卻送春艸憶釣磯。再應徵書丞相老。三爲祭酒大夫稀。聖朝舉欲留儒者。豈得歸田志不違。

寄朱二亭

念君里舍會絲簧。獨屏吟詩兩鬢蒼。閉戶不知誰與語。向人自謂我非狂。居惟甕牖仍耽酒。行過旗亭就賣漿。送我橫江歸艇疾。蜀岡西望幾斜陽。

### 臨江寺塔

江上浮屠三十尋。半登迴首見楓林。夕陽忽送孤鴻出。暝色將生百雉陰。浩浩東流浮積氣。茫茫後死獨傷心。西風飄蕩蒹葭外。止有滄浪漁父吟。

### 寄任幼直

昔開金匱集羣賢。花藥春風坐榻連。藏史著書歸苦縣。祠官侍禮在甘泉。羈閑繫馬階前地。悵望飛鴻樹杪天。豈必知音當代少。衆中時一鼓琴絃。

### 寄孔攜約

岱山樅檜鬱嵯峨。礪戶秋風吹女蘿。早厭雕蟲卑入室。遲歸金馬且槃阿。萌芽頗歎言詩少。枝葉惟嫌擬易多。千古著書非近用。廟堂伊鬱獨絃歌。

聞禹卿以書名上達。幾更出山而竟止。因寄。

王氏風流草隸兼。江東行樂且遲淹。解官誓苦歸元早。合妓情多聽不慚。家作道民輸斗米。身惟服食乞戎鹽。練裘團扇名皆貴。豈必凌高署殿檐。

哭魚門

魚門素有同居之約。今春聞其引疾。方爲欣然。而魚門旋以訪畢中丞于秦沒矣。子幼才三歲耳。

遇君通籍已華顛。猶見雄才賦百篇。送別議聯元亮井。論文曾許伯牙絃。十年白虎成通論。幾日揚烏與太元。一入崑函身不返。空聞解紱買江船。

論書絕句

襄屐風流貴六朝。也由結習未全銷。古今習氣除教盡。別有神龍戲絳霄。筆端神動有天隨。迅速淹留兩未知。莫道恩恩真不暇。苦將矜意作張芝。雄才或避古人鋒。真脈相傳便繼蹤。太僕文章宗伯字。正如得髓自南宗。論書莫取形模似。教外傳方作祖師。老去差當捫鼻孔。世南臂痛廢書時。

本是嶽奇可笑人。衰羸今況髮如銀。薑芽斂處成何狀。正得嚴家餓隸倫。

### 哭孔攜約三十二韻

孔夢興疇昔。斯文失在茲。世從乖大義。家尙誦聞詩。舊德誠遙矣。通家願附之。壁中書若授。坐上客何辭。往歲南宮直。東征使節持。鹿鳴君始賦。駿骨竊先知。庾信升朝歲。揚雄好賦時。翰林真不忝。家法亦胡虧。文富韓陵石。書摹鄒嶧碑。談經工折角。好學復深思。海宇承無事。宮庭大有爲。九流讐祕省。三俊接彤墀。博誦先王語。當求孔氏師。二劉今幾見。後鄭獨勤儀。君作儀鄭堂。嘗乞余爲記。老氏藏書室。儒林習禮帷。廟堂君竟返。延閣士奚資。道德慙途說。文章劣管窺。燕居頻接邴。狂論每無疑。處處同杯酒。殷殷愛履綦。逮聞辭禁闕。先已病茅茨。岱嶽分天峻。江流控地卑。龜陰人去少。舒口鴈來遲。鵬鳥妖斜日。龍蛇在歲支。風流前日會。天意百年期。橘幼靈均頌。蘭摧長史悲。豈教爲異物。真見瘞瓊枝。銘鼎幾先德。沾袍辨異辭。君書來云。羊學方爲之。說未竟。書成寧餅肆。身泯罷臚斯。適就潛夫論。希聞智者規。九原終不達。一卷更投誰。余以經說及見。計不。影鬢秋增白。雙髦昔對垂。止餘名篆在。啓篋涕交頤。

### 寄釋誦茗

瓶鉢相逢慧業兼。碧雲詩法授江淹。離居一夕身衰白。禪悅多時味屬厭。陶令社容耽枕麩。周生室久謝無鹽。卻思半日山光寺。共聽風鈴語塔檐。

答孫補山中丞過港口萬年庵見懷二首

嶺嶠頻褰問俗帷。流歛夾道擁蠻夷。建牙巨海重雲上。弭節千山落日時。明月珠崖盈近岸。祥颯神廟送歸旗。縣聞諸管環相慰。久識中朝吳隱之。  
湘東松竹帶郵亭。十五年前兩使星。鴻翼久迴春水白。隼旟重向越山青。僧堂吟就興遙夢。麟閣圖成失壯形。我欲更除三宿戀。就公新治乞壇經。

聞香苴兄擢廣東按察使卻寄二十韻

舊德前朝在。傳家後起難。江山留治迹。詞廟足辛酸。兄仕初爲令。君恩每改官。分符臨夏口。建節過閩灘。荒服南溟闊。雄藩列嶂巘。命提中典使。首立外臺端。經術良爲本。科條亦可觀。霜風清瘴癘。蛟鱔伏波瀾。陳氏嘗慙長。諸袁實繼安。公卿終可致。道德在無刊。永憶家風厚。咨嗟獄吏殘。深文堪惕息。考讞極創痍。昔濫京倉祿。晨趨省戶丹。循書黃案尾。默媿惠文冠。隱几今懷耿。中宵每竊歎。政茲褒召杜。道必閉申韓。

陳臬雖無陂。推情或未殫。勿憂陳奏卻。翻戒慮囚寬。梅嶺延冬燠。荊檐臥歲闌。公私相望切。引領屬加餐。  
詠史

將軍猶駐碧油幢。積石河源未盡降。安定有城名第一。隴西出將每無雙。牧民豈謂非良幹。伐畔何教震友邦。憶昔盟書金似粟。百年金鼓不聞撻。

答客

藜藿麤營便閉關。幾看榮謝隔谿山。淹留正爾因衰病。敢笑何公去復還。

大觀亭

中丞祠倚石厓青。杖策秋風更一經。舉目衰林如脫髮。幾人采鞠制鬢齡。清江三面舒州郭。南嶽千峯皖口亭。落照橫天鴻鴈起。獨憑長嘯對冥冥。

黃慎雨景



數椽深壑架茅茨。亂木靈雲出谷遲。忽聽後巖飛瀑急。四山風雨已多時。

李敦庸荷葉雙鳧

落盡芙蓉葉未枯。野塘深處啜雙鳧。貌來合乞忘機侶。曾入煙波得見無。

謝陳勤齋方伯餽紙

已震戎韜靖阻遐。又瞻弭節澤天涯。游思竹素眞餘事。分乞谿藤賁物華。身媿詞人居楚國。腕嫌餓隸出嚴家。安能泚筆形周翰。會見褒書降草麻。

懷故學士朱竹君

洛下書生起侍朝。獨陵天地氣飄飄。青雲後進時來附。白髮前交意每饒。中夜酒多猶擁榼。過春花少尙連鑣。卻臨杖節經游地。立望江亭晚落潮。

懷故編修程魚門

走昔雕蟲志尙勤。十年操牘每從君。承吟雌霓知聲病。荷定雞人潤小文。白下退將鄰舍卜。玉堂晚逐少年羣。世間一別逢無日。聞有遺孤未履屐。

唐伯虎墨筆牡丹

兩枝芳蕤出深叢。休比徐熙落墨工。曾向金陵參法眼。了知花是去年紅。

離思

畫角一聲江郭。布帆幾疊風亭。前日故人千里。倚樓依舊山青。



# 惜抱軒詩集卷九

## 今體一百十首

### 寄天柱山人

天柱萬重雲。雲中抗棟棼。巖花稀見客。松蔭獨隨君。浣手旁行字。琴心內景文。坐忘如著論。須與謫仙聞。

### 入龍眠

策杖向山碧。心清境亦幽。樹陰藏雨漬。花落信風柔。鳥迹交深逕。人家面曲流。寧當容竝舍。終歲託夷猶。

### 江路感舊

山藏春穀堞。岸折石城船。白髮尋前路。青春似往年。落花江館雨。叢樹縣樓煙。未逮忘情者。臨風故黯然。

野戍

野戍孤無障。停舟此作鄰。連朝江路冷。數點岸花春。白霧離邨樹。青蕪向渡人。無從商去住。試禱水祠神。

江路又一首

無復平生侶。重於古迹經。春風吹短髮。江路數長亭。帆遠橫天白。山多跨地青。寂寥仍獨往。風浪接滄溟。

寄靈谷僧

自昔居靈谷。終年聽石湍。落花趺坐軟。深樹衲衣寒。孤月胸前指。千山定後看。無緣居士室。暫接問輕安。

漫游

東風吹脫鬢毛斑。舉世誰如老子頑。欲抱龜蓍終蜀肆。豈將詞賦動江關。五更竹露聽蕭寺。一選松風入蔣山。越客偶談天姥勝。相逢倚杖夕陽閒。

謝簡齋惠天台僧所餉黃精

衰年不願海山居。願舐淮南藥鼎餘。但使體中還少壯。更偕兒輩向詩書。蒼山旨蓄承分乞。白首飛蓬或埽除。想見赤城霞畔路。長鑊木柄下空虛。

輓陳勤齋中丞

西南地控五谿遐。承詔單車往建牙。出令蠻夷方企踵。從行琴鶴政忘家。山圍幕府秋迴鴈。霜落旌門曉聚雅。故宅但瞻雙戟在。迎歸白旆拂江花。

陶怡雲深柳讀書堂圖

我如枯樹託婆娑。愛見新條發舊柯。往日讀書真恨少。少年如子豈能多。風軒百尺搖陰翳。雲幌千秋對嘯歌。願得隔窗斜倚聽。立深飛絮覆塔莎。

王孔翔香雪梅宴集圖

渡江春盡冬初去。風雪寒山獨閉門。羨殺烏衣衆年少。梅花時節又開樽。

讀書秋樹根圖

秋容自老君方少。昕夕披尋歲月長。不識五車書就日。卻須林葉幾番黃。

孔信夫舍人自揚州挈舟見訪。將自此適蘇州。章淮樹觀察邀與共觀家伎。因作此送信夫。

櫻筍成時燕入堂。當軒陰重草初長。共扶白髮三千丈。來看金釵十二行。灑座玉船傾若下。指塗蒲席向吳闔。明朝萍迹都成憶。耳識仍增記繞梁。

題右軍帖

蘭亭衆會獨傷懷。先墓歸誠誓更哀。顯授何嘗較懷祖。扶生或竟遜方回。峩眉汶領終難至。青李來禽尙可栽。我亦年今垂耳順。千秋思若坐中來。

雨夜

秋館蟲吟出草根。倚窗塵榻一燈昏。瀟瀟半夜龍江雨。知有寒潮又到門。  
簡齋年七十五。腹疾累月。自憂不救。邀作豫輓詩。

龍飛四載一詞臣。吟嘯江山五十春。莫怪尊前爲了語。當年同輩久無人。  
一代文章作滿家。爭求珠玉散天涯。替人未得公須住。天上寧無蔡少霞。  
宮闕前朝迹惘然。隨園花竹獨清妍。故墟憑弔終難免。且願從游更數年。  
氣聚升爲五色霓。條然散與太虛齊。海山兜率猶黏著。那更投生向玉谿。

作書戲題

遂良舊日鬢皆白。祕監今年臂更衰。結習欲除猶未盡。前身或是永禪師。

哭孔信夫。次去歲觀伎韻。君自遺書。乞余銘墓。

公子聲高魯廟堂。爲余江水遡游長。石銘歸託名千載。玉版前留墨數行。  
鵬臆恍知從物化。人情未可扣天關。清樽急管同聽處。依舊烏衣上玳梁。



次韻答毛學博

文家俗見蔀千層。嫵媚誰曾識魏徵。若反清言從正始。使同乳穴復零陵。有源君導如春水。無盡人分是慧鐙。愧我尙爲知解縛。不成得髓自南能。

江北青山隱隔層。今秋豐穀應休徵。東籬正可歸彭澤。左席奚求赴信陵。諸物總非長袖舞。相看各守短檠鐙。初涼好共尋巖桂。拄策僧廊病尙能。

倪學博欲爲設食。而僕病後畏酒肉。次前韻。約爲茶果之會。

看花眼霧亂層層。蒲柳先秋信有徵。渴愛旗槍烹似乳。鬧嫌壺矢祝如陵。連朝荅木衡三品。薄晚鹽齏共一鐙。君爲禪房設清供。試拈螺蛤小詩能。

又示客一首

已識西堂合射艱。況教口腹累人間。庾郎正貴陳三九。袁粲何須破八關。明月清風同人座。綠葵紫蓼總開顏。不容更命門徒議。早聽周生諫小山。

秋室漫咏

積痾謝書冊。人事亦無關。曠爾一室內。秋聲動遠山。廊依風葉轉。砌繞露花斑。客至希言說。依依久坐還。

隱仙菴雙桂。相傳元時植。秋時花開極盛。攜客及幼子師古觀之。因賦。

鍾離真主渡江前。雙桂蜷枝已刺天。南國市朝非曩日。西風闌檻又經年。黃金萬葢香浮閣。白雪千莖冷覆磚。零落滿塔君勿歎。吾生那得較花堅。

漫游

青嶂連江抱隔闌。此閒容託葛天民。垂金花落秋將老。流汞光升月又新。際几無心從喪我。登山有句偶驚人。每攜邛竹尋蓬蘚。容有齊梁迹未湮。

登清涼山翠微亭下。重入隱仙庵看桂。偕浦柳愚山長。毛俟園倪健堂兩學博。

亭高碧嶂秋風上。帆出青天曉日時。一攬橫江全楚勢。再尋幽壑小山枝。樓前影擢交龍起。雲裏香薰駐。

鶴知賴接數君情不淺。不妨繞樹坐頻移。

次韻同年蔣澄川見懷。澄川去夏皖中貽詩。今夏始達。

江北江南兩岫雲。從風偶聚又披紛。鋤犂久分終南畝。隴隧今傳誓右軍。難得經年通尺素。況期千里合離羣。相望都似秋林葉。澹倚寒山挂夕曛。

毛俟園用僕看桂前字韻作詩見貽。因復答之。

萬里清江到坐前。又逢佳客九秋天。短筇共散幽憂疾。芳樹誰知偃蹇年。君輩論文推馬齒。世閒相士貴鳶肩。止宜不負看花約。自斷平生志已堅。

問張荷塘疾

君抱幽憂卻酒卮。空堂視蔭每同誰。今年青女慵司令。九日黃花未吐枝。欲起毗耶居士疾。愧無天寶謫仙詞。瓦棺閣外江天遠。請眺餘霞落鴈時。

喜胡冠海至

高樹寒陰落掩扉。城頭鍾阜夕煙微。青楓江上人才返。黃菊花初蟹欲肥。行樂繁錢隨處好。論詩燒燭隔年違。黑頭那易身無事。且爲頻來趁短暉。

天門

草綠濡須口。天青博望門。雲山開四面。波浪急東奔。地有千秋感。人傷垂老魂。頻年逐帆影。幾處認潮痕。

題畫

橫風吹雨過林邱。萬片飛雲作水流。倚檻數峯藏又見。渾如天際識歸舟。  
千巖雲起壓林低。黃葉聲涼送馬蹄。雨急看山行更緩。野人家止隔前谿。

觀明賢在楚宗室宅。詠繡毬花詩卷。郭美命首唱。凡十九人。王夢樓跋尾。有評繡毬花詩。以宋牧仲爲冠語。因題其後。

往日東風帝子家。濡毫上客寫妍華。時乖竟值憂危議。春盡難留錦繡花。節概青編悲志士。文章白髮笑生涯。從游紫栢猶吾願。綺語何煩甲乙加。

答朱石君中丞次韻

衰年簷蔔甫聞香。那得全將六用藏。縱有隨之推老馬。其如後者未鞭羊。使君膏物真時雨。故侶零柯怨早霜。不貴藥珠傳不死。諒公宇定自天光。

天界寺閣遇兩蜀僧

南朝宮闕悉榛荆。尚有楞檀閣未傾。坐看青山圍建業。來從赤腳下桐城。殘英偶爾餘春色。布穀冷然早夏聲。萬里峩眉僧接鄰。小窗深潑夕陽明。

送方坳堂解官後將之上江

鎖闥將闢始聞名。夢過春秋二十更。三省最遲應出把。九州獨許蓋先傾。山當蕭寺時停騎。身付扁舟欲濯纓。我亦舉頭偕衆望。謝公終起爲蒼生。

君與名山宿有期。那應長閉入車帷。好乘腰腳年來健。徧攬煙霞物外奇。僧俗總隨雲水宿。漁樵或與姓名知。故當飽歷人間路。歸見桃花一笑時。

### 重宿幽棲寺

南山東面最孤鶩。拄杖時攀問法源。紺宇中臨千嶂小。黃梅旁出一枝尊。春塔雨歇纒懸榻。夏院陰成又扣門。深洞了無來去迹。只餘石溜滴苔痕。

### 陳東浦方伯招飲瞻園次韻

前代英雄不可尋。千秋臺榭敞憑襟。欹松立石冷風度。暗草叢花夕照深。官閣留傳多故實。謝公寢處愜山林。酒闌倚檻容吟嘯。無那高垣易夕陰。

### 次韻答吳竹橋

稱病君真似長卿。我如蒲柳老無榮。文章已謝當時好。止足寧希史傳名。獨立懷人常企踵。相逢狂論復盱衡。清詩冷若臨風笛。吹徹秦淮秋氣生。

題吳竹橋湖田書屋圖

中田有精舍。挾冊青林閒。起見海東月。流光湖上山。時聞漁者唱。或值耦耕閒。非得忘機侶。翛然自掩關。昔君辭省閣。余亦臥江濱。山淥垂湖岸。宜容澹蕩人。藏書多足老。資物少無貧。更欲刺舟往。相從忘主賓。

題黟縣朱榮朝望嶽樓圖

記託新安郡。晨朝見異峯。遙思黃葉逕。多被白雲封。孤往未能決。他年焉可逢。披圖如曩昔。惆悵列巖松。

題李僊枝四友圖

君築巖居積翠重。飄然偶出似雲龍。孤舟乘興行千里。襁被吟詩入萬峯。屢痛昔賢披墓草。自希良友結霜松。歸休梅竹廂疏裏。風雪余將策杖從。

方坳堂觀瀑圖

泰山北面寒巖谷。曾逐谿聲就朗公。莫道出山泉竟去。舉頭長在碧雲中。

坳堂觀察自安徽返將歸濟南仍入都補官餞之於清涼山

天門赤岸涉波濤。問訊秋來迹已勞。風雨才晴將送遠。江山無際共登高。重來郭伋誰能必。獨立王尊氣自豪。衰眼摩揩瞻事業。何妨萬里縱旌旄。

題坳堂所藏諸城劉文正公手蹟

獨立清修動主知。喟然蒼艾在彤墀。後來董令思文偉。誰許王宏繼穆之。竹素蒼茫千載事。邱山零落百年期。寸縑中有平生感。曾共山公把酒卮。

跋汪稼門提刑登岱詩刻

昔乘積雪被青山。曾入天門縹緲閒。日觀滄溟猶在眼。白頭明鏡久驚顏。壯才許國朝天近。名嶽裁詩擁傳還。盛藻宜標千仞上。衰翁無力更追攀。

過蕪湖



不見春江際。安知路所經。遠隨煙外席。時逗岸邊亭。鵲尾雲彌白。鳩竝山漸青。更投前港宿。雨勢復冥冥。

四合山阻風

柳枝搖不息。久立望空津。帆勢遙投戍。濤聲故近人。雲光開岸晚。草色澹谿春。安得知言者。披襟志一申。

天門阻風

亂山蟠野合。雙嶂矗雲開。地擁江聲出。天橫雨勢來。輕蓑漁故往。挑菜市都回。老子惟高枕。東西任擊鼙。

東梁山僧舍

津濤行復滯。峽嶂路還緣。石壁凌江閣。風林隔浦舡。鶻盤岬樹側。狔出浪花巔。往迹無儔伴。春陰彌悄然。

復阻風

三月鶯花盡。江邨直似秋。陰從亭午合。風挾暮潮留。水氣侵厓上。寒聲在樹頭。長年仍益纜。水宿亮多憂。

烏江阻風

金陵如咫尺。牛首在船窗。棹往彌求速。波來未可降。急風吹白雨。薄暮泊烏江。鐙火連檣底。瀟瀟雜語龐。

楊龍友墨蘭竹

秣陵春盡倍銷魂。紅藥花殘綠萼存。被惱更尋修竹逕。千叢元是畫時孫。

江左風流染翰時。越疆同裏故人尸。風蘭露竹容相憶。寒食曾無上冢兒。龍友殉難時。吾鄉孫武功監軍。與之同死。後監軍子收其骨。併龍友合葬桐城北楓香嶺。余嘗至其墓側。

爲周期才題春江歸棹圖

如織江帆上下流。無人天際識歸舟。昨來停棹還西去。畫裏昇州似鄂州。

陳約堂武陵汎舟圖

曠懷無染俗情濃。芳樹春流到處逢。喚作武陵何不可。桃源元止在君胸。

憶禹卿在南昌

我憶人閒王禹卿。休心總異少年情。青娥玉笛春風盡。朱雀金花夜氣生。揮塵便應通肇論。折釵偶或作顏行。洪州止爲西山戀。便滯南來累月程。

游攝山宿綠雲菴二首

不見深巖桂。微風谷口香。披雲過石徑。聽澗到僧房。穹壁天空峻。環林地籟長。欲求明處士。偃蹇待斜陽。叢樹未搖落。寒山已改容。自攜孤杖影。晚下最高峯。燭隱秋聲閣。詩成夜壑鐘。白頭餘健在。幽處欲潛蹤。

最高峯登眺

已上巉嶠又佛臺。正逢秋霽夕陽開。地窮江海與天際。山自岷嶓夾水來。南國中原同下類。華林衰草幾千回。何當住此雲霄上。長與星房日馭陪。

題汪君試硯齋圖

涵空高蔭氣清冷。黝玉開匳發古馨。蕉葉滿窗苔滿逕。倚楹研綠寫黃庭。

題畫

山遠雲尤澹。江空影最長。秣陵秋易到。不獨爲林霜。

瓦棺寺

招提地亦古。長干圍入南城。體勢殘。穿逕石崗隨繚曲。到門風葉颯清寒。虎頭無影存金粟。馬鬣何年出瓦棺。尙有里民矜故事。一成臺上集文翰。前有小阜。民謂卽風皇臺。側建鳳游寺。

翠微亭

蘭若門中山逕清。攀躋幾折與雲平。排空疊嶂穿城入。鋪地橫江隔樹明。天運九秋如有怨。人思萬古到無生。奇文腐草要同盡。何用登高作賦名。

掃葉樓

碧雲垂下大江流。坐倚江城古石頭。丹嶂欲平猶作巘。青楓未落已成秋。三山夕照新林渚。萬里西風墜葉樓。虎踞地形猶在眼。清涼深院發鳴虬。

陳碩十藏管夫人寒林小幅

獨於疏澹著精神。山遠林枯意倍真。借問倪迂嗣誰法。右軍書學衛夫人。

癸丑重九無樽酒之會。往問袁香亭同年。亦獨居寂然。乃邀登雨花臺。臨眺至暮。香亭有詩。和之  
二首。

六朝建國猶形勝。九日登臺思悄然。故壘蕭疏黃菊節。旅懷搖落白頭年。秋聲城郭千家樹。返照雲霞萬里天。若對江關悲作賦。不如山石解談禪。

君解銅符五六年。逢余黃髮白門前。彈冠舊侶真無幾。策杖清郊尙有緣。俯踞小亭衰草地。仰思高座雨花天。兩翁自愛尋荒迹。豈必龍山會衆賢。

婺源胡奎若藏黃石齋自書五言詩蹟題後。

直言瀕死荷戈餘。社稷猶思再埽除。指佞朝廷惟汲黯。存亡時勢異申胥。秋來草沒宮門路。石齋將死。過故宮門。猶下車。夜半鐙寒屋漏書。要識艱危成節概。不隨流俗在平居。見榕邨記。

和袁香亭在鄭思贊孝廉宅看牡丹

三月江城泛玉卮。朋簪不異少年時。露華朝暖春應駐。幽檻風微日漸移。興極捲幃看國色。病餘擁麈作僧詩。惟君彩筆猶豪健。合有紅雲捧硯池。

和袁香亭清話

白頭老子尙婆婆。未便空山考在阿。紅藥塔前春事減。沙棠舟上酒情多。衣沾天女花難去。隙閱奔駒影易過。試就詩人乞禪悅。右丞容卽古維摩。

朱白泉觀察以僕往昔訪其先公運使於泰安時所作詩文各一首同裝成卷見示感題

平生交友接龍門。霽雪高山共酒尊。立處不知天下小。坐中祇謂古人存。文章海內亡知己。旄節江東見後昆。留得白頭如夢過。舊書重展落嘵痕。

贈釋妙德嘗作老子疏者

上人杭越秀。攜笠到江邊。宴坐苔生地。談空花雨天。道場隨里舍。法性寄詩篇。了悟無人相。何妨解又元。

過明孝陵

蔣侯山與故宮連。想見興王作邑年。銀海竟從僧易地。石牀空令女朝天。山青尙似觚棱闕。澗涸曾無功德泉。正是江邨寒食節。落花飛絮羨門前。

見諸君作莫愁湖櫂歌戲擬四首

繁華才過卽千春。遺跡荒寒任水濱。復送酒船歌板至。那知中有斷腸人。春光易盡是湖涯。桃李陰成柳作花。和雨和煙千萬樹。不知誰是莫愁家。游人散盡漸烏棲。惟有漁舟半隱堤。一曲櫂歌明月上。淒清風露女牆西。前古煙波後世樓。教人歡喜耐人愁。新詞才子情深淺。付與雙鬟試轉喉。

游瞻園和香亭同年兼呈東浦方伯及在坐諸君八首

自有丹陽郡。何時不勝遊。名園今日會。官閣累朝留。古意蟠松正。天成立石稠。遠思營建力。名字向誰求。  
開第從徐氏。元功得賞延。飛龍天子去。喬木世臣傳。室榻神疑在。山亭迹邈然。時將青簡事。回憶綠尊前。  
儒者資爲政。維藩見節旄。阜居憑井邑。清氣擁林皋。暇日聊陳醴。臨風一染石。毫梯摹蜀道。往迹念仍勞。  
高軒開夏氣。幽檻剩春花。蘿翠升還墜。松聲壯不譁。褰衣穿數曲。當席眺千家。未覺淹留久。江天送落霞。  
山遠良難步。江空遽易臨。無如三畝近。不厭四時吟。苔藉幽人履。風披牧伯襟。寧如羊叔子。感慨畏幽沈。  
諸君羅俊藻。野客與追陪。地下魚爭出。天邊鶴亦來。朱顏今已過。笑口古難開。豈恤狂言發。頻當覆酒杯。  
畫手有袁張。同時并擅場。筵前交履舄。海內各文章。雅集圖如就。裁詩墨盡香。祇憐才盡者。偏畏孽牋長。  
夙願鍾陵下。茅茨架薜蘿。卜鄰人有幾。小築計云何。地異官齋闕。朋隨風雨過。耆英真可會。山似洛陽多。

送李齋生歸揚州後卻寄

論交談藝氣飛揚。清夜纔邀共舉觴。楓葉江天舟檝杳。桂華樓榭雨風涼。悲傷短髮秋三月。淪落高才水一方。計日賁來還有約。蚤除東序布藜床。



懷祝芷塘

聞住華亭四五年。東風輒爲望江船。料應玉貌今衰醜。卻誦清詩轉妙妍。地上朋儕餘有幾。天涯風雨颯無邊。白頭垂憶平生事。更寄傷情到海壖。

江南榜發同居諸友多被落感歎成咏

九日明朝至。千山秋氣來。江南悲送客。雨際能登臺。旅館須耽醉。風帆且緩開。誰憐黃菊節。多滯白衣才。

有懷雒君

秋陰不成雨。黯黯望空津。楓落初寒水。帆行失意人。山林遠遠性。書筴逐羈身。安得將尊酒。相邀慰此辰。

毛俟園情樸山道人。設素食於隱仙庵。見邀同袁簡齋。浦柳愚。金麓邨。陶讓舟。王柏嵯。馬雨畊。門人朱珏同游。其時桂花甫謝。率咏一首。

野蕪烹香進舊醅。鶴儀道士住蓬萊。青山曲曲藏修竹。紅葉莖莖映碧苔。孔蓋蔽空雙立柱。龍腰偃地半

枯梅清風又引羣賢會。何必花時逐衆來。

別治三

日月雙輪邁。文章一管窺。劣容留後死。敢謂使先知。求子才寧易。從余志亦奇。深山有神會。何異接披帷。  
秣陵城外水。空遠動離心。楚澤同津去。歸旌隔浦深。秋風吹短日。江霧蔽長林。孤唱中流發。寥寥無賞音。  
荻芽初出麥莖寒。中有江桃作意丹。開落年年天不管。夕陽洲上獨來看。

洲上見桃花

祝袁簡齋八十壽。時方送小郎就婚湖州。

春風鳩杖挈佳兒。棗栗盛筭共壽卮。樂事天教今世獨。才名人作昔賢疑。分司且遜休官早。柱史從留食  
乳遲。會見小倉編後集。較多盈萬渭南詩。  
先生築館冶城隈。壇坫爭趨末座來。司馬從官嘗雨立。元戎小隊及花開。後堂弟子聞歌管。西邸英王致  
酒杯。此日壽登誰不慶。早詢安否遍中臺。

送香亭重赴嶺南

昔君溟海我燕京。萬里相逢建業城。草綠冶亭同策杖。花明江閣擁彈箏。東山未可留安石。南越重須見陸生。又送離忔天際望。自垂白髮入紫荆。

重游隱仙庵。并詣古林律院。承諸君和僕去歲詩韻見示。因復繼和三雲通守四十矣。前見其貌似年少。因以入詩。今知其誤。故復以詩解之。

殘花猶未墮蒿萊。拄杖濃陰踏逕苔。魚鳥都於吾輩慣。江山轉憶昔人來。觀空應叩鋪金地。遣累頻斟釀玉醅。歸把清詩慰岑寂。一庭繁雨綴青梅。

江城朗見玉山來。當座朱顏發綠醅。流轉光陰速輪轂。飄蕭花絮付莓苔。黑頭子豈輸王簿。禿髮余真似賀梅。四十功名非使晚。會看風引到蓬萊。

賦得謝公墩

昔聞謝太傅。登眺此江東。宰物仍高韻。清言見道風。早齊東海德。晚配始興功。曹植詩多怨。羊曇慟復窮。

閭閻葵扇在。烟竊石城空。遠想非無土。從游詎有公。一墩當水白。三月落花紅。更作書生咏。青山夕照中。

香亭得雉。於其去歲所失小郎。有再生之徵。一詩爲賀。兼以識異。

普門大士感修熏。福德兒重乞細君。正似吾鄉張太傅。再招東晉大將軍。張文端太傅。自稱王敦。母始夢有異人。名敦哥。數歲殞。母夢甚。夢異人復至曰。吾終爲夫。人子。遂產太傅。名之敦復。太傅長。遂以爲字。金環粟穴真堪信。老蚌珠胎倍可欣。逸少諸郎他日貴。不妨小者最超羣。

### 次韻答朱二亭

遼關江山又值秋。企余猶限水悠悠。文章我欲從障頤。筋力君堪較上樓。風雨白門尋史傳。邱山黃土想朋儔。幸餘禿鬢人間老。那不相思一命舟。

### 題朱涵齋都統使面洛神兼臨十三行二首

誰識傷心賦洛神。每思千載一天人。持將使面西風障。卻愛凌波韞下塵。都統丹青祕殿儲。偶傳斷箒亦琳瑯。正如大令多兼擅。烏髻牛成便作書。



# 惜抱軒詩集卷十

## 今體九十三首

過程魚門墓下作

憶挈柔豪就石渠。春風花藥襲襟裾。隨珠荆玉多奇士。金匱名山見異書。霄漢幾人成令僕。滄洲吾道在樵漁。獨君埋骨青山隧。長鬣松呼似識余。

送江寧郡丞王石丈運餉入蜀

兼座師王文莊公之子

使傳驅天府。家聲長地官。書名留御墨。急病在衷丹。行受專城寄。寧辭報國難。天從秦嶺窄。身入棧雲寒。轉餉千峯裏。傳餐萬木端。才猷經事大。體骨積勞安。憶昔趨階序。初欣見羽翰。山邱嗟歲往。風義值江干。短髮飄藤架。長歌共藥闌。亭皋春寂寞。閣道路巉岏。涼燠車中換。精懷事外寬。吾衰君自壯。談笑去征鞍。

題夢樓集

與君交久無如我。竝到頭童白領髭。事業銘鐘都未逮。林泉投絨卻非遲。燕關秋氣聯吟袂。江寺潮聲接臥幃。五十年閒都憶起。一鐙廿四卷中詩。

送陳東浦方伯自江寧移任安徽三十二韻

衡嶽羣舒地。橫江六代都。風煙通上下。民俗別荆吳。駐節方從化。移轅有待蘇。生申元四國。借寇豈私吾。白下公初莅。黃中信早孚。從容文禮樂。談笑奠江湖。小察羞誇智。訐猷始作謨。五年休息意。四境蕩平途。愛士憐彈鋏。知音辨濫竽。古風宣護夏。僞體關榛蕪。豈以文防政。真看效是儒。甘棠方茂舍。瓠子計塞芻。天語褒丹鳳。人心繫白駒。皖公先在望。泗上且須臾。四載俄安宅。雙旌遂載驅。同州淮海合。分省井疆殊。作伯臨諸帥。投閒有一夫。登龍慚郭泰。伏鷁媿南趨。江遠林煙澹。霜初岸草枯。遠借迎竹馬。近卽送檣烏。回首思鄉郡。傾心仰大鑪。土風兼俠武。鄰域急軍需。狗有生鰲逸。人無佩犢羸。依仁諧衆願。舞德況微軀。劇邑將辭醴。歸邨更飲醑。瓶開惟說尹。襁負共將雛。九派潯陽會。千峯天柱孤。詞源瞻几杖。坐上又醍醐。此地朱營口。他時北斗樞。旬宣寧楚尾。羽翼上天衢。業廣同環海。恩周詎向隅。形容羣作頌。傳詠懌吳歙。

寄袁香亭時爲塙門同知

同歲書生盡白頭。異時江國共登樓。蒼茫身世餘孤策。歷落山川又九秋。雲出易迷巖曲岫。鴈飛難到海南州。卻聞壯事猶能作。談笑吳霜拭佩鉤。

題王麓臺山邨扇面

谷口停舟傍石林。幽人猶隔幾重岑。濛濛山氣將爲雨。待長谿流二尺深。

偕陳渭仁。吳子見。朱引恬。南濱游攝山。宿般若臺院。次日。邀釋卓羣入寶華山。

九月寒初未擬還。江南草樹正孊斑。短筇慣識青巖路。白髮重攜向攝山。萬葉霜凋變錦叢。雙巖金碧擁行宮。宮門右畔谿橋石。竟日涼颺響墜紅。密樹陰沈般若臺。珍珠泉映井天開。蕭條彌勒龕邊宿。一夜橫江風雨來。路掩青山舊孝陵。村零黃葉古江乘。騎驢共踏秋風裏。新識南宗小院僧。雞犬民家帶柘桑。誌公人說出東陽。寒山一往無尋處。卻見鷹窠是道場。



慧居寺恭閱三朝御書

獵獵霜風拂袂斜。偶攜僧械入岵岈。山蟠句曲橫青靄。樹自深巖上碧霞。霄漢奎章藏鷲嶺。人天法會憶龍華。白雲蒼狗塵寰感。也到空林釋子家。

寄吳殿麟聞其里人欲爲舉孝廉方正

天都山下結茅茨。閉戶盤桓自命蓍。弟子三千周士貴。公孫五十漢徵遲。朝中筐篋將更策。天下文章要起衰。聞道洛陽才不世。吳公第一始深知。

鷲峯寺

寂寂青谿水。蕭蕭祇樹園。江潮春入郭。海月夜當門。銀杏風前活。寺有銀杏已死金容世外尊。殿中佛像  
總捨宅時造。金陳隋銷落後。來聽道人論。  
色獨異他像。

葆光寺

一徑循修竹。高低杏靄閒。秋風深院柱。寒色寺門山。龍象來居少。寺無方丈僧。鴉烏暮語閒。故人餘隱迹。孤杖此追攀。方塘堂嘗避于此。

### 報恩寺

江上來興甲。宮中失委裘。升朝君難靖。建刹母恩酬。風物長千古。雲山短髮秋。浮圖三百尺。陟級望滄洲。

### 南唐

小朝偃蹇大江東。煙月流連六代風。建業文房收寶笈。清涼法眼啓琳宮。帝都執玉才嫌後。天塹浮橋已架空。一聽大梁春夜雨。最思花是去年紅。

### 龍江阻風

紫金山外俯羣巒。白鷺洲前木葉丹。十月清霜天地肅。一江空水古今寒。往來未定秦淮宅。冷落唯投大澤竿。坐待暮天霞作綺。吾生何處不盤桓。

憶慧居寺

九聞初鴈在江南。一詣靈山杖策探。  
殿角夜明升鷲嶺。鐘聲秋發過龍潭。  
歸攜衣袂煙霞染。迴望雲關石樹參。  
料得老僧居絕頂。峯坳時見度風帆。

歸舟

風起橫江晚未休。躊躇山下送歸舟。  
遠天青白依依日。近樹丹黃颯颯秋。  
早歲經過忘故迹。百年死喪憶前儔。  
老翁萬事投空寂。只寫清詩處處留。

過黃陂湖

離家百里泛晴川。遲速吾心總曠然。  
澹淡風揚初日上。高低山匝一湖圓。  
連邨黃葉叢叢霧。舉櫂滄波面面天。  
好景一過須記取。擬同兒女話鐙前。

自嘲

冬烘老子木棉裘。苜蓿盤邊與古謀。曳踵車輪良病緩。拄頤劍首正嫌修。雖讐七略無藜火。未證三幡愧  
芘芻。儒佛兩家無著處。祇將黃髮邁時流。

嘉慶丁巳三月十六日。阻風於繁昌三山磯。因游三華菴。菴爲僧山若建。山若傳爲明進士。楚人。  
不知其姓名。國變後爲僧。塔在菴左側。

青山緣曲逕。紺宇帶修林。江影高軒覆。花光小閣深。峯巔橫落照。門外澹春陰。不厭風潮阻。頻爲淨院尋。  
勝國傳遺老。開山託巨磯。三衣藏服屨。一鉢寄餐薇。名姓塵寰滅。波濤過客稀。祇聽松竹韻。三歎出巖扉。

寄李雨邨 調元

故人與我尙人閒。曾傍金羈玉筍班。地勢風煙難蜀道。天涯雲水各江關。偶將文筆傳消息。竟謝簪纓執  
往還。衰鬢不妨論事業。發揮潛德又誅奸。

題畫

深谷高巖寺閣扃。疏林谷口見谿亭。亭中恐是龐居士。坐對無埃山四青。

未凋林碧發梅紅。石壁天齊岸勢窮。搖艇更深何所遇。武夷君在白雲中。

題夢樓集

春雨高梧灑夜涼。夢樓詩卷伴虛堂。未知他士堪看否。我自微吟欲斷腸。

題韓魏公早朝像

當年秉笏獨書思。每進難陳父子詞。逮託北門榮晝錦。永昭陵遠夢罍罍。

王文成公像

餘事功名到五谿。室家累世輯羣黎。除將道統千秋重。我更傾心爲鼓鼙。

宋人水殿圖

金波鵝鷓麗秋光。高下空明水一方。天淨不知河漢轉。玉階風露覺新涼。

趙承旨天寒翠袖圖

冷落山花閒竹竿。誰言空谷異長安。態濃意遠無人見。自倚天風翠袖寒。

王太常雨景

沙上浦漁歸。煙際邨林閉。風雨黯成昏。湖山轉清氣。

將會夢樓於攝山道中有述

太平門外雨初晴。又聽新蟬第一聲。轉轂年光逢小暑。夾衣天氣似清明。山雲近作迎人態。僧院歸如返舍情。未死故人重執手。舉看藤杖一枝輕。

別夢樓後次前韻卻寄

送子挈舟趁晚晴。沙邊暝立聽橈聲。百年身世同雲散。一夜江山共月明。寶筏先登開覺路。錦箋餘習且多情。饜頭半箇容吾與。莫道空林此會輕。

次韻贈左蘭城

我似頽陽尙弄晴。子如雛鳳發新聲。殷勤老馬途頻問。高下精金市自明。共案八關尋至味。聯牀三宿係餘情。屬將道域深攀援。更覺文章小技輕。

題趙雨亭出關圖

葉君中子譎伊犁。趙與有舊。葉沒。又往致其柩歸。

冰雪天山照往來。懸旌四見玉門開。尊前渥赭顏如昔。身是唐朝老萬回。

秋至

積雨晴時風滿襟。夕陽空院落疏陰。暑過秋至關誰事。付與寒蟬樹上吟。

自海峯先生喪。十餘年。甯不至樅陽。今年自江寧循江西上。過其故居。不勝追愴。乃作二詩。

往時四海一衡茅。頻使升堂命酒肴。輕許便當人俊傑。高言寧計衆譏嘲。寥寥空宇今羅雀。兀兀荒臺古射蛟。草宿重因天下痛。百家新學總譌淆。

縱陽山市枕江濱。何陋慶園只爲君。此日羊曇重下淚。百年端木永離羣。霜風激激團亭水。天日昏昏大澤雲。正是平生停櫂地。招魂當復細論文。

松圓老人小景

荒寒空水夕陽流。落鴈聲遲近荻洲。識取松圓詩裏畫。秣陵天遠不宜秋。

松圓谿山亭子

半依平遠半巖扃。雜樹逢秋一半零。入谷未深林未密。拈來詩思在谿亭。

入山

雪餘冰泮日華清。試向寒山託漫行。曳杖穿林逢客少。解裘登嶂覺身輕。丁東石溜巖幽出。層疊嵐光樹上明。取作分司隨口句。驚人無復謝宣城。

徐半山桂



已將僧械謝塵緣。猶有深情拜杜鵑。極望湘南天更遠。秋風零落桂連蜷。

仇英熏籠宮女手持團扇

梅萼香薰靜女旁。熏籠煖倚意寒涼。懷中不合時宜在。愛詠齊紈冰雪光。

輓袁簡齋四首

早應詞科稱玉堂。出臨大邑見文章。流傳政牘吳歛裏。得助詩才蔣阜旁。官罷買田如好時。身亡起塚在桐鄉。祇憐行樂平生地。門掩西州澹夕陽。文集珍傳一世閒。兼聞海外載舟還。千篇少孺常隨事。九百虞初更解顏。竈下媪通情委曲。硯旁奴愛句。編斑。渾天潭思胡爲者。縱得侯芭亦等閒。館閣江湖竝盛名。胸苞今古手持衡。當關報客無朝暮。下筆噓枯有性情。羣輩角巾從郭太。公侯小巷候君卿。希光時彥今多少。籬溷辛勤悵賦成。半世秦淮作水嬉。沙棠舟送玉簫遲。錦鐙耽宴韓熙載。紅粉驚狂杜牧之。點綴江山成綺麗。風流冠蓋競攀追。煙花六代銷沈後。又到隨園感舊時。

嘉慶戊午二月十一日。攜持衡偕左良宇叔固。張侍喬晴牧。素從。同遊雙谿。四子留宿山中。侍喬及余持衡暮歸。憶去歲是時。亦與諸君游集于此。因作二首。

千嶂龍眠碧玉圍。雙谿蟠遶玉龍飛。圓隄松響交山閣。曲崦花光照礪屏。青草已埋黃閣骨。絳霄還振素流衣。衰羸幸與年年會。昏黑猶嫌早命歸。

此邦曾住李公麟。何處山莊閒翠筠。衆壑莫如今據地。四朝誰問昔時人。龍眠山甚廣。然莫佳於太傅墓前。疑昔山莊卽此。雨過澗漲多新響。崖闔林開別貯春。玉局黃門徒對畫。吾曹差勝得身親。

### 寒食雨

細雨冷風日夜催。陰沈庭戶長莓苔。山城樹底花頻墜。關路淮南客未來。三月晚春悲老物。百年後死待奇才。坐看暝色階前合。北嚮寒空數鴈哀。

### 哭錢侍御澧三十二韻

能國惟君子。平時讓俊民。九苞鳴大夏。一鶚降秋旻。士盡歸遺直。朝方賞諫臣。如何孤有德。終歎百其身。

家世昆明遠。聲名上國珍。青編先珥筆。白簡奮當仁。受詔乘軺急。當官襪被貧。九流分混汙。三族責頑嚚。始使清流重。終教惡女顰。遷官依日側。持節度江濱。魯酒師圍趙。曾參罪惑親。湘東辭樹蕙。滇海臥誅榛。脫穎賢名舊。聞絲帝念新。雲霄重起翼。風雨又司晨。授命官何擇。賢勞事不均。更生徒禁闥。長孺是前薪。心苦非搏石。言高觸秉鈞。苟無光日照。蚤與禦魍鄰。被薄焚香夜。盤空翳韭春。孤危仍不恤。溘死又誰論。節概今無兩。文章古與倫。廟堂虛讜議。館閣重詩人。昔試儒家法。招徠觀國賓。登茲一片玉。忝作九方歎。晏笑鋪筵會。潺湲擊袂辰。江湖漂擊櫂。霄漢望拖銀。遠慰空庭目。時烹尺素鱗。病羸增復減。兒女學兼姻。任道誠無負。論交亦有神。祝雞從廢墜。乘驥又遭迍。宇宙宏才少。風霜往迹陳。蒼生卒何望。青史豈終淪。

題宋院畫林檎孔雀

風舉高枝露葉乾。明花暄日鳥情歡。世間好處憐儔侶。翠尾張屏盡意看。

張呂環選勝圖

何處龍眠勝。無如太傅墳。嵐光千嶂合。泉響四邊分。前月吾行至。春風鳥獨聞。只憐煙月暝。幽絕不逢君。

謝蘊山方伯得晉永平八磚以爲研作寶研圖圖中三子侍

琢磨新試磨煤煙。委臥荒榛幾歲年。匣研寶貽安石後。甄泥事在永和前。列階才已成三秀。入院聲應嗣八磚。便爲越中誇故實。不須零瓦問甘泉。

螻蟻靈澤夫人畫像

增維大耳紫髯兄。螭首帷中與論兵。英氣不隨興廢盡。危機時覺怒濤聲。中興天子得成家。撫鏡佳兒祀麗華。原廟一類霜露冷。不如蘋藻奠江涯。

汪蛟門少壯三好圖。康熙間題詠數十家。今藏秦編脩敦夫處。屬題其末。

世間嗜好總雲煙。差有風流翰墨傳。長卷展窮階蔭轉。強將衰病附前賢。

題釋果仲詩

慧業何嘗不可珍。研思處處鬪清新。寒山拾得誠難企。正作人間休上人。

祝芷塘同年惠書，併以新刻詩集見寄，復謝。

浩蕩君才江漢浮，魚龍沙石盡從流。豈徒小我吞如芥，更使前賢放一頭。集鳳文章遺舊省，垂虹煙水澹新秋。圖書跌宕應忘老，莫爲悲傷歲月愁。

查篆僊淳於揚州，訪得其族二瞻墓，荒翳幾盡，爲脩整種樹立碑，旋獲二瞻舊硯於僧舍，自紀以詩，屬繼作二首。

一團紫壁墮僧扉，無復蛟龍引墨飛。百歲白虹重吐氣，更從濡染瀉珠璣。  
形骸石硯孰爲親，一臥荒郊一几茵。梅壑有靈應附此，諸孫門內接詩人。二瞻號梅壑老人

爲胡維君題說經圖二首，圖三人，一維君，一錢晦之，一陳仲魚。

遺經殘缺在人間，已墜斯文不復還。一髮千鈞餘傳說，九州三子尙追攀。孝廉郡國同推舉，吳越溪山共燕閒。若使老翁參坐論，頻遭奪席也欣顏。

聞名吾未識錢陳，應是東南兩俊民。最憶半生同研席，獨誇胡子出風塵。文章經術元同貫，場屋徵車總

致身他日聖朝論。白虎三君誰是著通人。

蘇州新作唐杜公白公宋蘇公祠於虎邱。嘉慶戊午八月。館及陳方伯諸公遊宴祠內。作四絕句。

柁樓吳越壯遊年。遺佚編詩歷下前。惟有高祠照寒水。文章千古寄雲煙。

文采風流並世芳。蘇州德業獨難忘。激波五宿渾兒戲。政使微之羨此堂。

端明過迹亦悤悤。遺像高樓醉面紅。記取樓頭看塔影。小山叢桂正秋風。

草堂橘刺藤梢裏。官閣清香畫戟中。繼蹟白蘇賢將在。老夫乘興使遊東。

獨餘叢桂小山幽。東坡爲虎邱詠也。時祠前桂花極盛。

### 穹窿山真一觀

山前雨歇日初升。盤道穿松出霧登。匝地湖光連海曲。垂天雲影落吳興。遙遙上古思蟬蛻。澹澹秋空縱鳥憑。周覽使辭高閣下。幾時重宿看神燈。

### 鄧尉

盛衰人事總無常。鄧尉梅枯半作桑。賴有山川長不改。倚欄依舊見漁洋。

古柏菴

高榦枝稀似立虬。裂柯橫草翠還抽。七株嘉慶三年看。更歷人間幾百秋。

石湖草堂

昔爲祠宇記。今訪石湖園。煙水長如此。風流向古論。堂開懸石趾。潭隱曲巖門。滿谷芳幽桂。虬枝誰與援。

楞伽寺

上方雲氣上。寺塔上方巔。杖策層層石。凭欄面而天。翠華嘗駐此。丹閣故依然。吳越吾初到。微茫眺海壖。

東浦方伯邀與同遊西山遍覽諸勝歸以二詩呈之

南北吳山又越山。排雲點黛洞庭間。乘舟秋水天空闊。拄策高巖徑曲環。石谷漫泉樹乳液。琳宮殘碣剔苔斑。歸來夜夜餘清夢。攜得煙霞到市闌。

海內詩才各長雄。幾人眞嗣浣花翁。草堂鵝鴨聊宜我。碧海鯨魚卻付公。松石相看懷舊日。煙雲同泛又秋風。極知老遇斯遊最。便腐柔毫寫未工。

謁德馨祠

先人莅政浙江潮。廟貌湖山鎖寂寥。近日守官新檻楯。百年父老戒蘇樵。青編史傳悲思極。白髮秋風道路遙。遺像幸瞻垂老日。獨慚無狀負登朝。

登松篁嶺酌龍井泉與吳江郭頻伽朱鐵門及持衡同遊及暮乃返

天宇青蒼秋氣悲。松篁嶺上拄藤枝。西湖煙景當巖下。北宋風流似晉時。龍井甘泉長不減。虎溪送客竟何之。幸逢佳士聊盤倚。月上西林隱半規。

虎跑泉觀東坡詩刻

神功虎穴作龍湫。乳竇杭州與潤州。一勺寰中尋廢寺。廿年招隱記閒遊。才誇新句蘇夫子。已誤前身戒比邱。飲罷清甘應有悟。高巖風葉墜當頭。



城隍山

秋風吹蕩亂雲開。曉踏吳山頂上來。左右江湖遙會合。東南天地此徘徊。宋宮衰草煙中白。滄海驚雷勢盡迴。都邑且誇今日勝。趾前城郭抱樓臺。

曉過蘇隄作

蘇公隄畔綠煙堆。行上澗波似鏡開。秋柳霜風餘旖旎。水亭金碧略傾頽。浙東峰影遙空見。湖外鐘聲四面來。更入南山深處住。擬將淨社結宗雷。

將去杭州。項秋子壩邀餞。余及持衡於其宅。同會者孫心蒔。侍講。曾孫貽穀。觀察。嘉樂。潘蘭垞。道長。麻筠。以一詩留別諸君。

絕境東南偶杖筇。西湖十臥寺樓鐘。無邊風月隨千重。不盡溪山任萬里。樽酒偕來尋舊夢。雲帆何處計前蹤。世間那有長相對。留語天涯慶此逢。

戊午八月廿六日過蘇州。恩恩一詣虎邱。後二十五日自杭州回。與馬雨耕及持衡重往。竟日登攬。因題八韻。

虎阜前朝寺。蜂房四面樓。檻前山杳杳。巖下水悠悠。負海帆斜出。生煙郭正浮。地標鈴塔峻。天納劍池幽。捨宅希塵外。開堂問石頭。樹凋吳苑綠。雲是晉時秋。一慕莊巖界。重經澶漫遊。不隨零落候。金粟爲余留。

別張慕青吳竹堂兩同年

此身千里一飄蓬。來值姑蘇兩寓公。宿草堆中思故侶。菊花樽畔贍衰翁。各隨腰膝尋山好。莫苦心脾索句工。盡醉便將孤棹遠。胥江西上水浮空。

無錫贈王錫公

吳山秋色舉杯前。各醉人間七十年。一別相逢應更少。只今同酌惠山泉。

宗人無錫半塘令君置酒寄暢園漫成一首。

九龍山下好園林。雲物秋來澗戶陰。迴棹江湖孤客迹。舉杯風雨故人心。青蒼石樹凌空色。隱見巖泉注壑音。此地買田陽羨近。總將遺迹付登臨。

丹徒值雨。夢樓邀挈持衡。及江鳴韶。同遊焦山。登東昇樓。

滄江僧榻壓龍宮。二十年前一宿同。偃蹇青山長待我。飄蕭白髮又乘風。檻前萬頃凌天外。樓上千生說夢中。何事驚濤翻急雨。苦將悲壯撼衰翁。

題花塢夕陽遲圖

誰辨韶光速與遲。無情有態問花枝。分明羲御長停處。正在凌雲一笑時。

張惺齋見示先贈侍讀公西阪草堂集。輒題一首。

數卷清風迥出羣。正如縹緲敬亭雲。宣城古是詩人地。張氏才多奕世聞。踰嶺奇遊蘇玉局。登樓傷別杜司勳。通家獨恨升堂闕。聊比中郎誌郭君。

方坳堂昂以巡道提調南關。被詔擢貴州按察使。僕適遊吳越。逮其出關。不及祖餞。以一詩追送。  
二十八韻。

千山百越郡。萬里五溪源。地遠開都會。才難任幹藩。皇仁同近輦。使者命乘軒。道在儒生勇。人依執法恩。  
繡衣將日月。襪被共朝昏。一夕朝青瑣。三年住白門。帝咨方略盛。民戴德風溫。涕泗秦淮水。徘徊禁掖垣。  
遄歸期仲甫。急病且臧孫。帆泝三江上。塗窮五嶺根。秋風彭蠡鴈。落日洞庭猿。志壯行無繫。時艱事有原。  
楚郊嗟獸駭。蠻洞聚蠡屯。太乙迴西指。將軍據右尊。風雲霾戰壘。歲月未夔韃。封事參降畔。夷情雜詐譖。  
喬良今屬汝。頗牧不須論。辱好如昌歎。瞻風接芷蓀。煙開江總宅。草長謝公墩。半榻棲荒寺。聯裾訪廢園。  
極知東壁蟋。豈偶北溟鯤。適越才開艇。興賢正閉關。盤遊淹帽履。情好隔筵墳。想像登車節。乖違祖帳樽。  
丈夫矜大志。兒女謾銷魂。國伐書金鼎。田家醉瓦盆。所欣光事業。非僅賴平反。寄望天涯路。因歌江上邨。  
阻風三山夾。因借陳碩士及兒姪遊三華菴。菴內牡丹頗盛。而僧不知惜也。

巖松塢竹俯江皋。小檻憑虛散鬱陶。南障近圍春穀縣。東風遙送廣陵濤。堂無鐘梵從僧懶。徑有苔蹤記  
客勞。冷落國香聊與慰。午晴扶向石臺高。

又寄方植之一首

草青雲碧接孱顏。一徑深林記共攀。步履只如前兩歲。停舟仍在上三山。巖空松響含風急。春盡花枝著雨殷。寄語閉門千帙畔。夢魂曾否到江關。

哭陳東浦方伯三十二韻

自古思賢傑。因時各長消。孤生情易感。偶合興膏饒。老我依經肆。逢公駐使輅。一從捫蝨話。屢歎阿龍超。九牧分潛霍。三江帶射洮。憂勞中野瘠。甄鑄在城佻。移轉天書重。周流水國遙。紫闈遲覲履。白旆促歸鑣。士尚崇三肄。民懷奉六條。縱非情合契。應惜韻孤標。昨歲舟同載。秋林葉始凋。登臨雲漠漠。唱詠水迢迢。山勢蟠吳越。天風送汐潮。援豪昔賢墓。解帶野僧寮。文字鈔榛碣。泉源酌木瓢。乾坤孤過客。今古一終朝。北闕求衣切。西垂擐甲敕。殷憂分聖代。得佐豈虛朝。未竟銘鐘鼎。徒思芟琫瑤。龍髯雲去路。鶴語雪寒宵。秦杵俄停相。虞廷正罷韶。滄洲波浩浩。空宇氣寥寥。六代煙霞郭。三春士女橈。神徠靈雨冷。迹在綠蕪蘼。車斗容凡物。堂階切久要。敢云當虎眠。深辱好蟲雕。江月今弦魄。吳颿舉過船。出迎周士披。哀和楚坐簫。貽厥爲箕近。恩斯作室翹。故人留白首。賢子尚青霄。盡此平生痛。從今道路遼。陳詩動冥漠。帷帳颯風飄。

孫淵如觀察 星衍 萬卷歸裝圖

自與雕板易鈔胥。市冊雖多亂魯魚。君自石渠繙七略。復依官閣惜三餘。世推列架皆精本。我願連牆借讀書。政恐衡山承召起。牙籤三萬又隨車。

